

**Peqquserluuteqartarnerup akiorniarnerani suliniutit qanoq
nukittorsarneqarsinnaanerat pillugu UKA 2019-mi nassuaammik
innersuussutitalimmik agguasseqqullugit Naalakkersuisut peqquneqarnissaanik**

**Inatsisartut aalajangiiffigisassaattut siunnersuut. Nassuaammi aamma
allaasereqquneqarput iluaqtissat ajoqutillu aamma aningaasatigut kingunissat
inatsisitigullu tunngavissat, arlaannaannulluunniit attuumassuteqanngitsumik**

**Peqquserlutsaaliuisussanik pilersitsisoqassasuuppat taamatullu aamma
peqquserlutsaaliuisussat pillugit inatsisiliortoqassasuuppat, peqquserluuteqartarnerup
akiornerani suliniutinik katersiviusussamik.**

pillugu

siunnersuutip aappassaaneerneqarnerani

Inatsisinut Ataatsimiititaliap

ISUMALIUTISSIISUTAA

Inatsisinut Ataatsimiititaliap suliarinninnermini kingullertigut uku inuttarai:

Inatsisartunut ilaasortaq Anders Olsen, Siumut, Siulittaasoq
Inatsisartunut ilaasortaq Sofia Geisler, Inuit Ataqatigiit, Siulittaasup tullia
Inatsisartunut ilaasortaq Nikkulaat Jeremiassen, Siumut
Inatsisartunut ilaasortaq Justus Hansen, Demokraatit
Inatsisartunut ilaasortaq Stine Egede, Inuit Ataqatigiit

Ataatsimiititaliap siunnersuut UKA2018-imi ulloq 18. oktober siullermeerinninnerup kingorna misissorpaa.

1. Siunnersuutip imarisai siunertaalu

Naalakkersuisut	peqquserluutinik	akiuniarnerup	nukittorsarneqarsinnaaneranik
kaammattuutitalimmik	nassuaasioqqullugit	pisussaaffilerneqassapput.	
Peqquserlutsaaliuisussanik	arlannaannulluunniit	attuumassuteqanngitsunik	
pilersitsisoqartuuppat	taamatullu	peqquserlutsaaliuinermut	inatsimmik,
peqquserluuteqartarnerup	akiornerani	suliniutinik	katerviusussamik
		pilersitsisoqartuuppat	

iluaqtissat ajoqutillu, aningaasatigut kingunissat inatsisitigullu tunngavissat nassuiaammi aamma alaaserineqassapput.

2. Naalakkersuisut akissuteqaataat

Naalakkersuisut akissuteqaamminni pinerluttulerinermi inatsimmi aalajangersakkanut sisamanut, peqquserloriaatsit taakku inatsisinik unioqqutitsisuunerannik aalajangersaasunut innersuussipput.

Tamatuma saniatigut inatsisinik atuutsitsinermut oqartussaaffiup suli tiguneqarsimannginnera Naalakkersuisunit oqaatigineqarpoq, taamaammallu peqquserluuteqartarnernik akiuniarnermut inatsimmik akuersissutiginnissinnaaneq Inatsisartut piginnaatitaaffiginnigkaat, taamaammallu tamatuminnga suliarinninneq naalagaaffimmii oqartussaasunik suleqateqatigalugit pisariaqartoq.

Qanoq suliffit iluanni nakkutiliinerit atutereersut allaffisornermilu malittarisassat pisortat pigisannik atornerluinernut peqquserlunnernullu naammattumik illersuutaatiginerat nassuiaasiaasinnaasumi taamaattumi ilanngullugit nalilersorneqarsinnaasut Naalakkersuisunit siunnersuutigineqarpoq.

Tamatuma saniatigut qanoq Naalagaaffiit Peqatigiit peqquserlunnernik akiuniarnermut nunani tamalaani isumaqatigiissutaata 31. oktober 2003-meersup, Danmarkip Kalaallit Nunaat pineqartunut ilaatinngagu akuerisimasaata imarisaasa Kalaallit Nunaanni inatsisilornermi ilanngunneqarsinnaassanerat nalilersussallugu naleqqussinnaassasoq Naalakkersuisunit oqaatigineqarpoq.

3. Nunani tamalaani peqquserluuteqarternermut naleqqersuut

Transparency International ukiut tamaasa nunat tamat akornanni peqquserluuteqarternermut naleqqersuummik suliaqartarpoq (Corruption Perceptions Index). Ajoraluartumik Kalaallit nunaat nunat sanillersuunneqartut nalunaarsorneqarfianni akuunngilaq. Peqquserluuteqarternermut naleqqersuummi nunani ataasiakkaani tusarfiit attuumassuteqanngitsut assigiinngitsut arlallit najoqqutaralugit pisortat ingerlatsineranni qanoq peqquserluuteqartoqartigisarnera najoqqutaralugu nunat 180-it nalunaarsorneqarsimapput. Nunat pineqartut peqquserluuteqarfiunnginnerpaamit peqquserluuteqarfiunerpaaamut tulleriaarlugit nalunaarsorneqartarput. Peqquserluuteqartarnerup nunarsuarmilu tamarmi tamat oqartussaaqataanerisa ajornartorsiortitaanerata imminnut ataqtiginnerat pillugu misisueqqissaarneq naleqqersuummi ilanngunneqartarpoq. Ajoraluartumilli Kalaallit nunaat paasissutissanik pissarsiffisanik amigaateqarnermik pissuteqartumik ilanngunneqarneq ajorpoq. Paasissutissanik pissarsiffiit assersuutigalugu tassaasinnaapput Verdensbanken aamma World Economic Forum. Taakku Kalaallit nunaanni nalilersuisanngillat.

4. Nunarsuarmi tamarmi peqquserluuteqartarermik uuttuut

Transparency International Greenland 29016-imi peqquserluuteqartarneq pillugu nalunaarusiorpoq. Kalaallit Nunaanni innuttaasut agguataagaanerannik agguaqatigiissitsilluni oqarasuaatikkut apersuinernik 510-nik tunngaveqarluni misissuisoqarpoq. Tamatumani apeqputit nunat tamat akornanni misissuineremi “Global Corruption Barometerimi” apeqputigineqartartut assigaat. Aatsaavissuaq Kalaalit Nunaanni misissuineremik taamaattumik suliaqartoqarpoq. Piffissami 11. januar-17. februar 2016, oqarasuaatikkut apersuisoqarsimavoq – kalaallisut danskisulluunniit apersorneqartup toqqaanera najoqqutaralugu.

Misissuineremi peqquserluuteqarneq tassaatinneqarpoq ‘Tatigineqarluni akisussaaffimmik tigummisaq atorlugu imminut iluaquserniarluni atornerluineq’. Tassa pineqartoq imaaginnangilaq anngiortumik iluanaarutigisinnasanik akuersilluni tigusisarneq aammali tassaalluni iluareqqusaarutinik akuersilluni tigusisarneq, tunngavissaqanngitsunik tunissutissarsisarneq aammalu ilaqtutanik/ikinngutinik/nalunngisanik iluaquiiniartarneq. Taamaalilluni taagummik “peqquserluuteqartarermik” pinerluttulerineremi inatsisitigut paasinnittaaseq kisimi pineqanngilaq.

Ilumut nunami peqquserluttoqartarnersoq inernertigut paasinarsisinneqanngilaq, taamaallaalli innuttaasut taamaattoqarneratut misigisimanerat.

Misissuineremi makku qulaajärneqarput:

a) Ukiumi kingullermi peqquserlunniartarneq annertunerulersimasutut misinnartinneqarpoq
 Aperineqartut affangajaasa peqquserlunniartarneq ukiumi kingullermi annertunerulersimasutut misinnartippaat. 11%-iisa assut annertuseriarsimasutut misinnartippaat, 37%-iisa annertuseriarsimasutut misinnartippaat. Assersuutigissagaanni taamaallaat 14%-ii isumaqarput peqquserluttarnerit ukiumi kingullermi annikilleriarsimasut.

b) Naalakkersuisut peqquserlunniartarneq akiorniarlugu iliuuseqanngippallaarput

Akissuteqartut 25%-ii isumaqarput Naalakkersuisut peqquserluttarernik akiuniarnermi iliuuseqarnerat ajorluinnartoq, 38%-ii isumaqarlutik pitsaanngitsumik iliuuseqartoqartoq.

c) Akissuteqartut akornanni Naalakkersuisunik inuussutissarsiornermilu pisortanik tatiginninneq appasinnerpaavoq

Akissuteqartut 22%-ii akipput Naalakkersuisut Naalakkersuisullu Siulittaasuat ‘tamarmik tamangajammilluunniit peqquserluttuusut’, Kalaallit Nunaanni inuussutissarsiornermi pisortanut tunngatillugu tamanna 16%-iulluni. Tatigineqarnerpaaq tassaavoq eqqartuussiveqarneq, tassunga tunngatillugu taamaallaat 5%-it isumaqarlutik tassani

peqquserluttoqartoq.

d) Peqquserlunniartarneq mianerisassat Naalakkersuinikkut iliuuseqarfingeqartariaqarnerpaat arfinillit ilagaat

Peqquserluuteqartarneq ukununnga tullinnguullugu pingaernerpaajusutut akissuteqartut 20%-iisa oqaatigaat; aningasaqaarneq/suliffissaaleqineq (74%), ilinniartitaaneq (57%), peqqinnissaq (48%), avatangiisit (25%) kiisalu pinerlunniartarneq/isumannaatsuuneq (24%).

e) Peqquserlunniartarneq avammut ersersinneqartariaqarpoq

Akissuteqartut 91%-ii misigisimapput peqquserluttunik malussarunik nalunaarutiginnittariaqarlutik 60%-it misigisimapput Kalaallit Nunaanni peqquserluttunik nalunaarutiginnittarneq nalinginnaasumik akuersaarneqartoq. Tamanna akerliussutsimik takutitsinernut, suliumajunnaarnernut allatulluunniit naalakkersuinikkut ersersitsiniarluni takutitsinernut naleqqiullugit pisortanut nalunaarutiginninnerit assersuutigalugulu tusagassiorfitsigut tamanut saqqummiussinerit peqquserluuteqartarnernik akiuiniarnermi sunniuteqarnerpaatut akissuteqartunit isumaqarfingeqarnerisigut taperserneqarpoq.

f) Pissaqarluartut/pisuut Naalakkersuisut ingerlatsinerannut annertuallaamik sunniuteqarput
77%-it isumaqatigaat inuit pisuut namminneq soqutigisatik sullikkumallugit naalakkersuisunik aqutsisarnerat nalinginnaavallaartoq, tamakkulu pinngitsoortikkumallugit malittarisassatigut sukaterisoqartariaqartoq.

5. Ataatsimiititaliap immikkoortumik suliarinninneranut atatillugu Transparency International Greenlandimit saaffiginnissut.

Ataatsimiititaliap immikkoortumik suliarinninneranut atatillugu Transparency International Greenlandimi (TIG) siulersuisut Inatsisinut Ataatsimiititaliap siunnersuummut tapersiinissaanik kaammattuummik nassiussippu.

TIG isumaqarpoq Kalaallit Nunaata Naalagaaffiit Peqatigiit peqquserluuteqartarnernik akiuiniarnermut isumaqatigiissutaannut ilangutsinneqarsinnaanerata misissorneqarnissaa piukkunnaateqartoq. Tassunga atatillugu tamatuma qanoq Kalaallit Nunaannut sunniuteqarnissaanik misissueqqissaarnermut nittartakkaminni takuneqarsinnaasumut innersuussippu¹, kiisalu peqquserluuteqartarnernik akiuiniarneq pillugu saqqummersitanut allanut². Taamaalillutik isumaqarput atortussaqartoq attuumassutilinnik arlalinnik

¹ https://www.transparency.gl/wp-content/uploads/TIG_Analyse.-DK.pdf
https://www.transparency.gl/wp-content/uploads/TIG_Analyse.-KAL.pdf

² <https://www.transparency.gl/publikationer-og-vaerktojer/>
<https://www.transparency.gl/ka/saqqummersittakkat-sakkussallu/>

nassuaasiornermi aallaaviusinnaasunik, isumaqarlutilu nassuaasiaq siunnersuuteqartumit siunnersuutigineqartutut ukumik ataatsimik piffissaliinerup iluani naammassineqarsinnaasoq.

6. peqquserluuteqartarneq pillugu pinerluttulerinermi suliat.

Ataatsimiitaliap immikkoortumik suliarinninneranut atatillugu ataatsimiitaliaq paasissutissanik politiinit pissarsiniarpoq, tassani sulianik pinerluttulerinermi inatsimmi peqquserluuteqartarnermut aalajangersakkanut tunngasunik qassnik suliaqartarsimanerat paasiniarneqarluni. Politiit qinnuteqaammut imatut akissuteqarput:

"Piffissami 1/1-14-imiit 31/12-18-imut ukuninnga suliaqarsimavugut:

Imminut iluaquuserniarluni pissortani oqartussaatitaasunut peqquserlutsitsiniutinik "nerriviup ataatigut" akiliuteqarnerit: Suliat sisamat (4) (tamarmik misileeriарnerit)

Akiliutinik peqquserlutsitsiniutinik tigusaqarsimanerit: 0

Pisortani oqartussaatitanik atornerluinerit: Suliat tallimat (5)

Eqqartuussisumut isumaqatigiisitsiniaasartumut akiliilluni peqquserluuit: Soqanngilaq (0)"

7. Ataatsimiitaliap siunnersuummik suliarinninera

Ataatsimiitaliap maluginarpaa taaguut peqquserluuteqartarneq pinerluttulerinermi atorneqarnermi saniatigut aamma allamut tunngatillugu atorneqarsinnaasoq. Inuaqatigiit peqquserluuteqartoqartarneranik nalaataqanngitsutut ataatsimut isumaqarfingineqartungavoq. Inuaqatigiit kalaallit taamaallaat annikitsumik peqquserluttoqarneranik nalaataqartarnerat ataatsimiitaliamit assortorneqanngilaq - qujanaqisumik. Taaguulli toqqaannanngitsumik paasineqassappat taamaanneraneq taamak tunngavissagissaartiginavianngilaq. Qanoq annertutigisumik innuttaasut ilaat innuttaasunit allanit pitsaanerusumik isumagineqartarpal, tamanna assersuutigalugu ilaqtariinnikkut allatulluunniit qanittumik susassareqatigiinnikkut piissutsit tunngavigalugit? Inuaqatigiinni atuuffinnik pingaarutilinnik inuttaliiniarnermi, assersuutigalugu soorlu siulersuisuni?

Naalakkersuisut akissuteqaamminni Pinerluttulerinermi inatsimmi aalajangersakkanut arlalinnut akiliilluni peqquserlutsitsisarnermut kiisalu pisortat aningasaataannik atornerluinermt pineqaatissiissutinik malittarisassiisunut innersuussussippu. Tassunga atatillugu Naalakkersuisut erseqqissaatigaat peqquserloriaatsit taakku inatsisinik unioqqutitsineroreersut. Akiliilluni peqquserlutsitsisarnermik pisortallu aningasaataannik atornerluisarnermik inatsisinik unioqqutitsisooreerneraanermut ataatsimiitaliaq minnerpaamilluunniit assortuinngilaq. Ataatsimiitaliarli isumaqarpoq malittarisassat aallaavittut pinerluttulerinermi unioqqutitsinernik isiginnittut pioreersut, pinaveersaartsinermulli tunngasortaa assinganik isiginiarneqanngitsoq.

Nassuaataasinnaasoq aatsaat UKA2020-imut saqqummiunneqarsinnaassasoq Naalakkersuisut akissuteqaamminni oqaatigigaat ataatsimiitaliap maliginiarpa. Naalakkersuisut ukiunik marlunnik piffissalerneqarnissap akuerineqarnissaanik kissaateqarnerminnik akuerineqassappata siunnersuutip aappassaaneerneqarnissaata kinguartinneqarnerata nassatarissavaa nassuaatip saqqummiunneqarnissaata UPA2021-imut inissinneqarnera. Allannguutissamik siunnersuuteqarnissaq tamatumani piumasaqataavoq.

Qanoq namminermut nakkutilliinerit malittarisassiallu pioreersut peqquserluttoqartarneranik pisortallu aningaasaataannik atornerluisoqartarneranik illersuutitut naammatsignerannik nalilersuinermik nassuaatip iluaqutaasumik imaqarsinnaanera pillugu Naalakkersuisut oqaaseqaataat eqqarsaatigalugit, taakku erseqqissaatitut ilanngunneqartut ataatsimiitaliamit taperserneqarput.

Taamatuttaaq qanoq Naalagaaffiit Peqatigiit peqquserluuteqartarnermik akiuinarluni isumaqatigiissutaanut 31. oktober 2002-meersumut ilanngutsinneqarsinnaanermik atuutsilsilertoqarsinnaaneranillu nalilersuinermik nassuaatip imaqarsinnaanera ataatsimiitaliamit isumaqatigineqarpoq. Tamatumalu nanginneratut ataatsimiitaliaq isumaqarpoq qanoq isumaqatigiissutit allat ilannguffigineqarsinnaanerinik atuutsilersonnaanerinillu nalilersuinermik nassuaat imaqarsinnaanera tulluartuusinnaasoq. Ataatsimiitaliaq tassunga atatillugu tusagassiorfikkut 2014-imi³ Europarådip peqquserluuteqarnermut pillaatissiisarneq pillugu isumaqatigiissutaanut ilanngutsinneqarsinnaanermik soqutiginnittooqarnersoq paasiniarlugu Namminersorlutik Oqartussanut saaffiginninnissamik Justitsministeriaqarfiup isumaliutiginninnerup allaaserisamut maluginninniaaqqusinissaminut tunngavissaqarsorivoq. Isumaliutiginninnerup taassuma qanoq timitalerneqarsimatigineranik, imaluunniit saaffiginnissutaasimasinnaasumut akissuteqartoqarsimaneranik ataatsimiitaliaq paasissutissaateqanngilaq. Ataatsimiitalialli paasivaa isumaqatigiissutit ilannguffigineqarsimanngitsut.

Qitiusumik allaffeqarfimmi taassumalu ataani immikkoortortani suleqataasunut peqquserlutsaaliuinermut najoqqutassiat, kiisalu aatsitassaqarnermut suliassaqarfimmi marts 2015-imi immikkut peqquserlutsaaliuinermut politikkimik ataasiakkaatigut najoqqutassiamut siullertut taaneqartumut naleqqiullugu ingerlaqqifflusunik aalajangersaasoqarsimanera eqqarsaatigalugit, qanoq najoqqutassiat sukannererusut taakku qitiusumik allaffeqarfimmut taassumalu ataani immikkoortortanut tamanut ilaannulluunniit atuutsilerneqarnerisa pitsaasusinnaaneranik nassuaatikkut qulaajaasoqarsinnaanera oqaatigissallugu ataatsimiitaliap tunngavissaqartippaa. Tamatuma assersuutigalugu Kalaallit Nunaanni

³ <https://www.berlingske.dk/business/groenland-staar-alene-i-kampen-mod-korruption>

aalisarnermi peqquserlutsaaluiunermut sakkussaasinnaanera pitsaasoq ataatsimiititaliamit mattunneqanngilaq.

8. Ataatsimiititaliap inassuteqaatai

Ataatsimiititaliap isumaqatigijittup allannguutissatut siunnersuut imaattoq saqqummiuppa:

Peqquserluuteqartarnerup akiorniarnerani suliniutit qanoq nukittorsarneqarsinnaanerat pillugu UPA 2020-mi nassuaammik innersuussutitalimmik agguasseqqullugit Naalakkersuisut peqquneqarnissaanik Inatsisartut aalajangiiffigisassaattut siunnersuut. Nassuaammi aamma allaasereqquneqarput iluaqtissat ajoqutillu aamma aningasatigut kingunissat inatsisitigullu tunngavissat, arlaannaannulluunniit attuumassuteqanngitsumik Peqquserlutsaaluiusussanik pilersitsisoqassasuuppat taamatullu aamma peqquserlutsaaluiusussat pillugit inatsisiliortoqassasuuppat, peqquserluuteqartarnerup akiornerani suliniutinik katersiviusussamik.

pillugu

Ataatsimiititaliap taama oqaaseqaateqarluni isumaliutissiissummilu allassimanceratut paasinnilluni siunnersuut aappassaaniigassanngortippaa.

Anders Olsen
Siulittaasoq

Sofia Geisler
Siulittaasup tullia

Nikkulaat Jeremiassen

Justus Hansen

Stine Egede